



Broj: 02-04-133/21
Datum, 02.02.2021. godine

ZAPISNIK

sa 3. redovne sjednice 7. saziva Općinskog vijeća Doboj Istok

Treća redovna sjednica 7. saziva Općinskog vijeća održana je dana 28.01.2021. godine u zgradi općine Doboj Istok, u Klokotnici, sa početkom u 10,00 sati.

PRISUTNI: 15 vijećnika, Kemal Bratić, općinski načelnik, Omer Hadžić, sekretar općine, Abdulah Hrnjičić, ovlašteno lice da zamjenjuje pomoćnika općinskog načelnika za prostorno uređenje, te predstavnik RTV TK.

ODSUTNI: Mehmed Mehinović, vijećnik SBiH i Samir Džanić, vijećnik Nezavisne liste Doboj Selvid Hurtić.

Sjednicu je otvorio i vodio predsjedavajući Općinskog vijeća, Selmin Karić.

Selmin Karić, predsjedavajući Općinskog vijeća: „ Uvaženi kolegice i kolege vijećnici, načelnice sa saradnicima, predstavnici medija esalamu alejkum i dobar dan. Otvaram 3. redovnu sjednicu 7. saziva Općinskog vijeća Doboj Istok. Zamolio bih tehničkog sekretara da utvrdi broj prisutnih na današnjoj sjednici. Prisutno je 15 vijećnika, a odsutni su Mehmed Mehinović i Samir Džanić koji su najavili odsustvo, što znači da imamo kvorum za održavanje današnje sjednice.“

USVAJANJE ZAPISNIKA SA PRETHODNIH SJEDNICA OPĆINSKOG VIJEĆA

Selmin Karić, predsjedavajući Općinskog vijeća: „ Dobili ste Zapisnik sa I konstituirajuće sjednice VII saziva Općinskog vijeća. Ima li neko primjedbi? Nema. Ko je za? “

Glasanje: ZA – 15, PROTIV – 0, UZDRŽANIH – 0.

Takođe ste dobili Zapisnik sa 2. redovne sjednice. Ima li neko primjedbi? Nema. Ko je za? “

Glasanje: ZA – 15, PROTIV – 0, UZDRŽANIH – 0.

VIJEĆNIČKA PITANJA I INICIJATIVE

Selmin Karić, predsjedavajući Općinskog vijeća: „ Ima li neko vijećničko pitanje ili inicijativu? “

Kemal Skopljak, vijećnik BPS – Sefer Halilović: „ Prije svega želim da pozdravim i poselamim sve prisutne. Ja imam jedno vijećničko pitanje i ono je upućeno načelniku općine Doboj Istok. Gospodine načelnice, obzirom da sam ja već jednom pokretao inicijativu za izgradnju trotoara između MZ Klokotnica i MZ Brijesnica Velika sa obrazloženjem zašto je taj trotoar ili pješačka staza neophodan i treba da bude prioritet broj 1. što se tiče saobraćajne infrastrukture u Doboj Istoku (vi tada nažalost niste podržali tu inicijativu), ali ste nam svima obećali da će to biti urađeno do kraja prošle godine. Evo ponovo vas pitam ima li od tog obećanja išta, ako ima dokle se došlo sa dogovorima i možemo li se nadati realizaciji bar u ovoj godini, jer očito je da ste prošlu već propustili.“

Kemal Bratić, općinski načelnik: „ Ja vas sve srdačno selamim i želim vam uspješan rad. Ja koliko znam vi niste podnosili inicijativu, nego je bilo pitanje i prošli puta kao i sada. Nažalost nadležnost magistralne ceste, kao što treba da znate, je drugih nivoa, ne općine Doboj Istok. Mi smo krajem prošle godine imali

jedan radni sastanak i posjetu rukovodstva Federalne direkcije cesta. Oni su nama čvrsto obećali da će realizacija biti i ja se iskreno nadam da će ona biti u toku ove godine. Volio bih, kao i svi vi, da je realizacija bila prije 10 godina, jer je to zbilja jedna stvar koja je prijeko potrebna. Ono što znam jeste da su dva projekta ušla sa područja općine Doboj Istok, a radimo na pripremi za apliciranje za još neke projekte koji će se raditi, ako Bog da, u narednom periodu. Svi smo svjesni, pa tako i vi, poštovani vijećniče, ove pandemije, koja je sve poremetila u cijelom društvu, ne samo u Cestama, kao što je slučaj na našoj Općini i na našem Kantonu, pa i na višim nivoima. Imam čvrsto obećanje i poslali su akt da je uvrštena u plan izgradnja trotoara i načelnik na tome radi. Nažalost ne bi to trebao raditi načelnik, a ne bi ni vi trebali pokretati inicijative, to bi trebao da radi neko drugi i da procijeni. Čini mi se da se radi o 900 i nešto metara izgradnje trotoara i ja se iskreno nadam da će u što skorijem vremenu biti urađen taj projekat kako su nam i obećali. Nadam se da ste zadovoljni odgovorom.“

Kemal Skopljak, vijećnik BPS – Sefer Halilović: „ Pod broj 1. ispravka. Prije tri godine ja sam podnio inicijativu koja je data na glasanje i odbili ste, samo da se zna. Pod broj 2. hvala vam na odgovoru i nadam se da će biti nešto od toga. Svi smo mi svjesni o kakvoj se vrijednosti i o čemu se radi, o kakvom faktoru rizika se radi za naše srednjoškolce, za našu djecu koja idu taj kilometar. Ko nije prošetao pješe ne zna šta to znači pored ovakvog saobraćaja, ovoliko kamiona i svega toga. Znači ovo nije bez veze i zbilja bih vas zamolio da date sve od sebe, da animirate, da urgirate i da se to već jedanput napravi.“

Senada Džanić, predsjednica kluba vijećnika SBB – BPS – SBiH: „ Predsjedavajući, zamjeniče, kolegice i kolege vijećnici, načelnice sa saradnicima, predstavnici medija sve vas selamim i pozdravljam. Imam dva vijećnička pitanja:

- 1. Da li načelnik sa svojim saradnicima može da riješi problem parking mjesta za građane koji dolaze u ovu ustanovu po usluge koje su im potrebne?*

Obrazloženje: Na osnovu pritužbi građana i usposlenika privrednih subjekata kojima su potrebne usluge koje pruža ova institucija da je skoro redovan problem parking mjesto u krugu zgrade opštine obraćam vam se ovim pitanjem. Parking prostor je velik, ali je redovno zauzet službenim vozilima opštine i vozilima uposlenika u opštinskim službama. Ta vozila su parkirana na najpristupačnijim mjestima na parking prostoru i nepomična su tokom cijelog radnog vremena. Izvjestan broj službenih vozila opštine takođe se ne pomijeraju tokom radnog vremena, znači nisu neophodna, a zauzimaju parking mjesta. Postoje civilna vozila koja su parkirana na parking u prije početka radnog vremena u opštini i odlaze mnogo kasnije po završetku radnog vremena i zauzimaju mjesta tokom cijelog radnog dana. Namjena ove institucije je pružanje usluga građanima te smatram da su ove njihove pritužbe opravdane i da treba riješiti ovaj problem.

- 2. Da li će se uskoro pristupiti rješavanju zamjene sijalica rasvjete na području općine Doboj Istok LED rasvjetom, odnosno hoće li se konačno riješiti neispravne sijalice koje ne rade.*

Obrazloženje: Na 13. sjednici Kolegija 6. saziva Općinskog vijeća održanoj 14.04.2020. godine sam upoznala načelnika i tadašnje članove Kolegija o ovom problemu. Načelnik je tada rekao da će u roku od 2 – 3 mjeseca doći do zamjene istih. Međutim, ni 9 mjeseci nakon toga ništa se nije uradilo. Kada će doći do realizacije? Građani Stanić Rijeke puno puta su se obraćali sa istim pitanjem kako meni kao vijećnici, tako i predsjedniku MZ Stanić Rijeka koji je ujedno i sekretar Savjeta MZ Stanić Rijeka, a isti u posljednjem periodu više vremena provodi u Njemačkoj (mislim da ni sada nije u BiH), pa su građani ponovo meni prosljedili isto pitanje u nadi rješenja ovog problema. Napominjem da se nadam da će ovaj problem biti riješen na području cijele općine, ali u Stanić Rijeci stvarno traje predugo i stiče se osjećaj bahatosti od strane onih koji trebaju rješavati isto. Takođe me interesuje da li ste od strane MZ Stanić Rijeka dobili izvještaj koje to sijalice ne rade.“

Kemal Bratić, općinski načelnik: „Nije tačno da je neko oborio vaše pitanje, ja uporno tvrdim da je to bilo pitanje, da nije bila inicijativa. Takva inicijativa je davno pokretana kada vi niste bili vijećnik, nažalost stvarno dugo traje realizacija tog projekta i meni je zbilja žao. Nemojte govoriti da je načelnik to oborio i da je načelnik bio protiv toga, jer da je načelnik bio protiv toga ne bi se ni pričalo o tome. Veoma je ružno da tako govorite ovdje za ovom govornicom. Parking prostor, nažalost, na području ne samo naše općine, nego i drugih općina, je problem, ali ja ću vidjeti, kada budemo donosili odluku koju ćemo pripremiti u

toku ove godine o naplati parking prostora na području cijele općine, kako će se pojedini vijećnici ponašati. Nisu samo građani općine Doboj Istok koji dolaze ovdje u ovu instituciju nekim poslom, građani su uposlenici općine Doboj Istok, građani su i privrednici i svi oni koji ostave automobil. Mi sada za sada nemamo uređeno to stanje, a imat ćemo, ako Bog da, parking prostor u Klokotnici i dio prostora u Velikoj i Maloj Brijesnici, tamo oko obdaništa i ovdje oko zanatskog, sve ćemo to urediti, ako Bog da, to je moj nijet, a naravno uz vašu podršku početi naplaćivati parking. Vidjet ćemo onda kako će naši isti građani da reaguju ili bilo ko drugi, a da li to bio vijećnik ili privrednik ili bilo ko drugi. Svugdje se plaća i moje je mišljenje da i mi trebamo uvesti makar nekakvu minimalnu naknadu, a onda ćemo napraviti prostora na svim područjima i ovdje ispred zgrade i u Klokotnici, Brijesnici, Stanić Rijeci, znači gdje god imamo javnu površinu kojem je vlasnik općina uvest ćemo naplatu parkinga. I načelnik ima problem kada dođe da nema gdje parkirati ovdje i ostavim ga onako gdje mogu i idemo svi za poslom. Nažalost u jednom dijelu ste u pravu, a to je da uporno ja pokušavam uposlenicima reći da ne parkiraju makar ovdje u ovom dijelu, a neke sam čak u nekom prethodnom periodu i kažnjavao i očito je da ću morati opet. Isti problem imamo, a gledam u Skopljaka, pred Domom zdravlja. Dođe 20 – 30 uposlenika i zauzme onaj prostor, a neki privrednici okolo još to popune i u Klokotnici imamo ogroman problem sa parking prostorom. Kada se radi o rasvjeti mislim da treba biti korektan, a očito da nismo korektni, jer općina Doboj Istok ima 1500 stubova ulične rasvjete, a to nije malo i ni jedan jedini fening ne plaćaju naši građani. U drugim sredinama po mojim informacijama se plaća do 4 KM mjesečno, a mi smo prošli mjesec platili 15.000 KM za uličnu rasvjetu. Zašto? Imamo čovjeka koji je te struke, duža je noć i sijalice malo više troše. Očito je da treba raditi na dvije stvari: prva stvar je izmjena ovih štednih sijalica, a druga stvar je da donesete odluku vi vijećnici da se dio električne energije koju troši javna rasvjeta naplaćuje od naših građana. Zašto? Zato jer je ovo velik iznos koji plaća Općina Doboj Istok. Vi znate, jer su neki od vas bili vijećnici, da smo radili ankete po mjesnim zajednicama i samo dvije mjesne zajednice su bile za to da građani participiraju u troškovima javne rasvjete. Samo dvije mjesne zajednice, od pet mjesnih zajednica dvije su se izjasnile većinski da su za plaćanje električne rasvjete. Neću govoriti ovdje koje su, jer znamo mi svi koje su to mjesne zajednice. Mislim da trebamo ići da donesemo jednu takvu odluku. Koliki će biti iznos to ćete vi odlučiti, a služba će pripremiti jedan prijedlog i da donesemo jednu takvu odluku. Kada sam 2012. godine preuzeo prvi mandat dosta tih sijalica je bilo pokvareno. Ne možemo mi reći evo postaviti ćemo sijalice i nemojte kvariti ili da se nakrivi stub itd. To su sve stvari koje treba otklanjati u hodu i popravljati. Ja vas pozivam evo javno ovdje da obidete druge općine, bilo koje, pa pogledajte ima li i jedna općina u svakom maltene sokaku uličnu rasvjetu i sa tim ću završiti, samo otidite pogledajte i susjedne i neke druge općine. Znači preko 1500 stubova ulične rasvjete ima općina Doboj Istok, a to nije malo. Od tih 1500 nešto nije radilo, nešto smo otklonili u prošloj godini i nastavljamo sa popravkama u ovoj tekućoj godini. Idemo u tom pravcu da ove koje prave veći trošak da zamijenimo sa LED rasvjetom. Međutim to je ogroman projekat, ogromna investicija i mislim da to trebamo raditi postupno, jednu po jednu mjesnu zajednicu i jednu po jednu po jednu ulicu. Nijet je bio i Ministarstvo za prostorno je donijelo odluku da se izmijeni LED rasvjeta, mislim da je u MZ Stanić Rijeka i mislim da je projekat još u toku. To je išlo preko UNDP uz sufinansiranje i da li će sada šta poremetiti ova smjena Vlade, ne znam, jer to nije naša nadležnost. Uglavnom ono što sam ja obaviješten jeste da je Ministarstvo za prostorno odvojilo 50.000 KM za rekonstrukciju ili izmjenu LED rasvjete u MZ Stanić Rijeka. Nadam se da ste zadovoljni odgovorom.“

Senada Džanić, predsjednica kluba vijećnika SBB – BPS – SBiH: „ Pošto načelnik reče da budemo korektni, ne volim to pominjati, ali sada želim, rasvjetu kod svoje kuće ja nisam htjela, a ni moj muž, iz razloga što u Stanić Rijeci nemamo svi isti tretman. Platili smo rasvjetno tijelo i plaćamo redovno svoju električnu energiju. Zašto? Zato što svi građani Stanić Rijeke nisu obuhvaćeni sa rasvjetom i ja sam to puno puta govorila i ovo sam željela naglasiti. Ja znam da se ne može sve preko noći, međutim ovaj problem u pojedinim sokacima, a pominjala sam Haskiće i Komarevac, jer tamo imamo probleme, gdje imamo situaciju da određeni građani ne mogu vidjeti blagodat rasvjete. Ja govorim o svojoj mjesnoj zajednici, a što se tiče sufinansiranja prva bi bila za to da mi kao građani sufinasiramo i da i mi kao vijećnici, ali da svi građani imaju iste beneficije od te rasvjete. Nadam se da me razumijete. U aprilu mjesecu rekli ste 2 – 3 mjeseca, a ni jedna ta rasvjeta u Stanić Rijeci nije popravljena. Voljela bih da dođete i da vidite kako je ujutro djeci iz Hodžića doći do škole.“

Kemal Skopljak, vijećnik BPS – Sefer Halilović: „Ja ću kratko samo da repliciram načelniku. Ja se trudim da nikoga ne vrijeđam pod broj 1. Pod broj 2. ono što predložim da bude konstruktivno i na mjestu trudim se zaista, ali načelniče vaš komentar ne stoji. Ovo sve što sam rekao ja ne mogu da shvatim da se tolike pare mogu baciti po brdima asfaltirajući kojekakve puteve da bi se lakše dolazilo do nekih

vikendica, a problem je kada mi raspravljamo o jednoj pješačkoj stazi koja je neophodna za sve i koja treba svima. Znači donosi ogroman benefit i našoj djeci i nama. Je li bitno ko je podnio inicijativu? Nije bitno. To samo govori da vi za pet godina niste u stanju bili izlobirati i uraditi jednu takvu stazu. Ništa drugo.“

Kemal Bratić, općinski načelnik: „ Vi očitó trebete malo više čitati uvaženi vijećniče. Znači, ovo nije replika, ovo što ste izašli i rekli to nije replika. Neću ni ja vama repliku. Morate čitati šta je čija nadležnost i morate znati šta je vaša obaveza i šta su vaše nadležnosti, a šta moja, a šta Federalne direkcije cesta, šta Kantonalne direkcije cesta, šta direktora Doma zdravlja. Ako mislite za vikendicu, je li mislite do vaše vikendice da je put napravljen, gore gdje imate vi zemlju? Jeste li na to mislili? Ja znam da imate i da ste vi lobirali da se napravi put prema vašoj vikendici. Pričat ćemo o svemu. Znači načelnik je lobirao, ali stalne su promjene, a vi očitó da ne živite ovdje, stalne su promjene, te na kontonalnom, te na federalnom nivou i remete sve stvari. Morate to imati na umu. Ako vi mislite da ja nisam lobirao evo probajte vi. Međutim, vi samo znate lobirati za sebe. Privatno za sebe samo znate lobirati kada se radi o svim stvarima. Samo o tome znate. Je li tako? Nemojte tako ovdje, ovdje se niko nikoga ne boji. Evo drugi ste mandat vijećnik, šta ste vi uradili?“

Emira Karić, predsjednica kluba vijećnika SDP: „ Srdačno selamim i pozdravljam sve prisutne. Budući da su vijećnici prizvani od strane gospodina načelnika kada su u pitanju diskusije po vijećničkim pitanjima mislim da je u redu diskusija tih vijećnika koji su prozvani. Što se tiče naplaćivanja prozvani smo u smislu, a šta ćete vi vijećnici uraditi kada bude donesena odluka o naplaćivanju bilo parkinga ili rasvjete evo i da odgovorim, nije do nas vijećnika gospodine načelniče. To je do vaše odluke, vi nemate tu snagu ...“

Selmin Karić, predsjedavajući Općinskog vijeća: „ Molim vijećničko pitanje, kolegice.“

Emira Karić, predsjednica kluba vijećnika SDP: „ Da, ali nas je prozvao. Po kojoj temi ja da odgovorim na prozive gospodina načelnika. Prozvao je vijećnike. Da rezimiram vijećnici se slažu ukoliko bude potrebno, jer naplaćivanje parkinga je urbanizacija, načelniče, što donosi nove projekte u smislu tih materijalnih dobiti. Isto tako naplaćivanje rasvjete, to nije nikakav problem s obzirom koliko mi plaćamo struju.“

Selmin Karić, predsjedavajući Općinskog vijeća: „ Kolegice, molim vijećničko pitanje.“

Emira Karić, predsjednica kluba vijećnika SDP: „Ja moram odgovoriti ili neću govoriti ništa i onda načelniče vidimo se na kafi.“

Selmin Karić, predsjedavajući Općinskog vijeća: „Nemate vi šta odgovarati, ja vodim sjednicu. Ima li još neko? Nema više.“

Senada Džanić, predsjednica kluba vijećnika SBB – BPS – SBiH, traži da joj se odgovori na vijećnička pitanja dostave pismeno.

USVAJANJE DNEVNOG REDA

Selmin Karić, predsjedavajući Općinskog vijeća: „ Za današnju sjednicu je predlažem sljedeći dnevni red:

1. Razmatranje i usvajanje prijedloga Programa rada Općinskog vijeća za 2021. godinu,
2. Razmatranje i usvajanje prijedloga Odluke o raspisivanju javnog oglasa za izbor i imenovanje na pozicije predsjednika i članova upravnih i nadzornih odbora javnih ustanova i javnih preduzeća čiji je osnivač općina Doboj Istok,
3. Razmatranje i usvajanje prijedloga Odluke o objavljivanju javnog oglasa za imenovanje predsjednika i člana Općinske izborne komisije,
4. Razmatranje i usvajanje prijedloga Javnog oglasa za imenovanje predsjednika i člana Općinske izborne komisije Doboj Istok,
5. Razmatranje i usvajanje prijedloga kandidata za imenovanje radnih tijela Općinskog vijeća Doboj Istok,

6. *Razmatranje i usvajanje Izvještaja o realizaciji Programa rada Općinskog vijeća Doboj Istok za 2020. godinu.*

Dnevni red dajem na diskusiju. Ima li prijavljenih? Nema. Ko je za ovakav dnevni red?

Glasanje: ZA – 15, PROTIV – 0, UZDRŽANIH – 0.

Znači dnevni red je jednoglasno usvojen.“

REALIZACIJA DNEVNOG REDA

Ad. 1. Razmatranje i usvajanje prijedloga Programa rada Općinskog vijeća Doboj Istok za 2021. godinu.

Selmin Karić, predsjedavajući Općinskog vijeća: „Tačku dajem na diskusiju.“

Emira Karić, predsjednica kluba vijećnika SDP: „ Ovaj okvir Programa rada je isti unazad nekoliko godina i pomijeranja su bila samo oko vremena, odnosno zamjene određenih tačaka u određenom mjesecu. Ja sam na Kolegiju Općinskog vijeća predlagala da se u Program rada uvrsti još jedna tačka koja bi se ponavljala kvartalno, a to je izvještaj ili informacija od strane Doma zdravlja ili od strane Kriznog štaba vezano za najaktuelniju temu, a to je borba protiv pandemije COVID-a 19. Načelnik je rekao da to ne može ući u Program rada Općinskog vijeća, prije svega zato što to nisu naše ingerencije što ne smatram tačnim. Mislim da mi imamo neke informacije na koje nemamo ingerencije, poput informacije koja je uvrštena u Program rada Općinskog vijeća, a vezana je za proljetnu sjetvu i jesenju sjetvu itd. Diskusije tokom tih tačaka su itekako bile kvalitetne, pa tako smatram da je i ovo trebalo da se uvrsti u Program rada svaka tri mjeseca da imamo određene informacije kada je u pitanju kao što rekoh borba protiv pandemije COVID-a 19. Doduše načelnik je obećao da će to biti tačka dnevnog reda koju predloži Kolegij i da će biti uvrštena na današnjoj sjednici zato što su sve te stvari od strane Kriznog štaba pripremljene, ali vidimo da ove tačke nema na dnevnom redu. Ja ću opet na Kolegiju insistirati da na narednoj sjednici februarskoj imamo tu tačku, pa ukoliko bude potrebno da imamo neke informacije i da diskutujemo o toj tački.“

Selmin Karić, predsjedavajući Općinskog vijeća: „Koliko se sjećam mi smo na Kolegiju tražili informaciju i da se informacija dostavi Kolegiju i vi ste se kolegice složili sa tim. Koliko se sjećam, a ima i zapisnik.“

Emira Karić, predsjednica kluba vijećnika SDP: „ Evo ima u zapisniku da je načelnik rekao da tačka ide na ovu sjednicu. Je li tako načelniče?“

Kemal Bratić, načelnik općine: „ Ili na iduću.“

Selmin Karić, predsjedavajući Općinskog vijeća: „ Ima li još prijavljenih? Nema. Ko je za usvajanje Programa rada Općinskog vijeća Doboj Istok za 2021. godinu?

Glasanje: ZA – 15, PROTIV – 0, SUZDRŽANIH – 0.

Ad.2. Razmatranje i usvajanje prijedloga Odluke o raspisivanju javnog oglasa za izbor i imenovanje na pozicije predsjednika i članova upravnih i nadzornih odbora javnih ustanova i javnih preduzeća čiji je osnivač općina Doboj Istok.

Selmin Karić, predsjedavajući Općinskog vijeća: „ Tačku dajem na diskusiju. Nema prijavljenih. Ko je za?“

Glasanje: ZA – 15, PROTIV – 0, SUZDRŽANIH – 0. 28.34

Ad.3. Razmatranje i usvajanje prijedloga Odluke o objavljivanju javnog oglasa za imenovanje predsjednika i člana Općinske izborne komisije.

Selmin Karić, predsjedavajući Općinskog vijeća: „Tačku dajem na diskusiju. Ima li prijavljenih? Nema. Ko je za?“

Glasanje: ZA – 15, PROTIV – 0, SUZDRŽANIH – 0.

Ad.4. Razmatranje i usvajanje prijedloga Javnog oglasa za imenovanje predsjednika i člana Općinske izborne komisije Doboj Istok.

Selmin Karić, predsjedavajući Općinskog vijeća: „Tačku dajem na diskusiju. Ima li prijavljenih? Nema. Ko je za?“

Glasanje: ZA – 15, PROTIV – 0, SUZDRŽANIH – 0.

Ad.5. Razmatranje i usvajanje prijedloga kandidata za imenovanje radnih tijela Općinskog vijeća Doboj Istok.

Selmin Karić, predsjedavajući Općinskog vijeća: „ Tačku dajem na diskusiju.“

Izet Hodžić, zamjenik predsjedavajućeg Općinskog vijeća: „ Poštovani načelnice sa saradnicima, uvaženi predsjedavajući, poštovani koleginice i kolege vijećnici, poštovani predstavnice Televizije Tuzlanskog kantona želim sve iskreno da vas poselamim i pozdravim. Pod ovom tačkom dnevnog reda imao bih mnogo što šta da pričam na ovu temu. Dobili smo prijedlog za imenovanje, odnosno za sastav radnih tijela, odnosno komisija kojih je ukupno devet. Apelirali smo na Kolegiju da politički subjekti koji predlažu kandidate za sastav ovih komisija predlože osobe koje će doprinijeti u radu ovih radnih tijela Općinskog vijeća. Imali smo slučaj u proteklom mandatu, ja govorim za komisiju u kojoj sam ja bio prisutan i smatram za potrebnim da to posebno apostrofiram i da istaknem, da je ta komisija koja je veoma bitna za rad Općinskog vijeća radila čitav mandatni period od četiri godine u veoma krnjem sastavu. Znači radila je na ivici kvoruma i uvijek su umjesto pet u komisiji nazočile tri osobe ili tri člana komisije. Govorim za čitav mandatni period iz razloga što dva člana komisije u konkretnom slučaju radi se o spoljnim saradnicima nisu se odazivali na sastanak ove komisije. Ja ne znam razloge, ali je odgovornost dijelom na predlagaču, u ovom slučaju na političkim subjektima koji predlažu članove komisija. Imamo tamo u izvještaju o radu Kolegija Općinskog vijeća, moje privatno mišljenje ja bih zadržao za sebe, ali sama činjenica da imamo devet komisija, devet radnih tijela i da od devet radnih tijela pet se sigurno nije sastalo nikako govori samo po sebi. Da li je to forma, da li smo nekada prije 20 godina prepisali od nekoga sastav tih komisija i uvrstili ih u pravilnik i da li treba da nastavimo sa istom praksom. Najviše zbog čega sam se javio da predložim jedan zaključak koji bi išao u sklopu ovoga da damo obavezu predsjednicima komisija, ako smatrate za potrebnim, da moraju najmanje jedanput godišnje održati, a u ovom slučaju na početku mandata konstituirajuće sastanke tih radnih tijela, da vide i da predlože Vijeću šta, kako i na koji način. Većina građana ne zna da ima u sastavu Općinskog vijeća Komisija za borbu protiv korupcije, pa da se možda napravi nekakav vid oglašavanja i da se obavijesti po mjesnim zajednicama koje to komisije rade. Možda bi bilo dobro razmišljati u budućnosti da možda nema potrebe za nekim komisijama. Na Kolegiju smo se dotakli malo te teme i možda ima potrebe, ne možda nego ima sigurno, za komisijom za sport da proširimo ili da neke ukinemo. Komisija koja djeluje u sastavu općine koju je imenovao načelnik sa punim pravom, a možda bude vijećnička komisija recimo komisija za saobraćaj i bezbjednost saobraćaja, pa komisija za vjerska pitanja. Možda bi te komisije mogle da doprinesu što boljem i efikasnijem radu Općinskog vijeća. Za mene kao vijećnika i kao građanina je poražavajuća činjenica da se imenuje jedno radno tijelo, drugo, treće, četvrto, peto i imamo ne samo u prošloj godini nego u toku čitavog mandata komisije koje se nisu baš nikako sastale. To je jedan prijedlog i možda, pošto smo propustili priliku, da na kraju godine imamo kumulativan izvještaj o radu radnih tijela, pa da predsjednici komisija na jednoj od sjednica da li u decembru ili januaru kada budemo usvajali plan i program rada Općinskog vijeća za iduću godinu dođu na sjednicu Općinskog vijeća i da prezentuju nama šta su „njihove“ komisije, odnosno radna tijela uradile u protekloj godini dana. Radno tijelo je produžena ruka i radno tijelo treba da služi i da pruža pomoć u radu nama vijećnicima prilikom donošenja što kvalitetnijih i što boljih odluka. Normalno samim tim da doprinesemo što boljem i kvalitetnijem radu i življenju naših građana na području općine Doboj Istok zbog čega smo i izabrani. Predsjedavajući ako može ja bih predložio ta dva zaključka da idu uz ovu tačku dnevnog reda.“

Kemal Skopljak, vijećnik BPS – Sefer Halilović: „Ja ću samo kratko da repliciram gospodinu zamjeniku predsjedavajućeg. Za vašu informaciju Komisija za borbu protiv korupcije se dosta puta sastajala, to sekretar može potvrditi, donosili smo neke odluke i oglašavali se u Doboj Istoku. Znači oglašavali smo se sa pozivom da se prijavi korupcija ukoliko postoji na svim mjestima za oglašavanje od svih javnih ustanova preko ovih mjesta za oglašavanje. To je samo za vašu informaciju.“

Izet Hodžić, zamjenik predsjedavajućeg Općinskog vijeća: „ Uvaženi kolega Skopljak ja se iskreno izvinjavam. Uopšte mi nije bila namjera da prozovem tu komisiju. Naveo sam primjer i uopšte nisam znao sastav te komisije. Iskreno nije mi bila namjera da prozovem bilo koga. Znači naveo sam primjer da se može tako raditi.“

Emira Karić, predsjednica kluba vijećnika SDP: „ Ja bih krenula prvo sa jednim prijedlogom, a to je da se zamijene dva politička subjekta kada su u pitanju komisije, odnosno da vijećnik iz NIP-a Osman Đonlagić zamijeni sa vijećnicom PDA Zerinom Subašić komisije iz razloga što smatram da bi bar Komisija za jednakopravnost spolova trebala biti u većini sa ženskim polom, a imamo tri vijećnice. Zna se zašto se bori Komisija za jednakopravnost spolova, naravno bori se za oba spola, ali znamo na što se odnose određene konvencije kada je u pitanju jednakopravnost spolova. Naravno ukoliko želite, a ja smatram da bi to bilo logično. Amandman može uložiti član 114. i član 116. i načelnik i predlagač. Možete se izjasniti, a ne morate, ali bi meni bilo itekako značajno da u Komisiju za jednakopravnost spolova bude bar jedan vanjski saradnik, ali vidim da je stvar gotova. Složit ću se zaista sa većim dijelom diskusije zamjenika predsjedavajućeg. Smatram da je jako loš rad u prošlom mandatu bio, pa sigurna sam, u 80% komisija. Imaju one koje zavređuju, da kažem, aplauz, ali 80% baš nikada ne naći za shodno da se održi jedan sastanak komisije po meni je jako nerazumno. Tako da ću i ja predložiti jedan zaključak, a složit ću se i sa diskusijom gospodina načelnika na Kolegiju da rad komisija isključivo zavisi od predsjednika. Znači on je taj prema Poslovniku koji saziva i koji organizuje taj rad. Šta sve komisije znače govori isto tako Poslovnik o radu član 35. i član 36. i ko zaista dobro isčita vidjet će da nisu uzaludne te komisije koje su organizirane pri općini. Tako da predlažem zaključak da predsjednici komisija dostave godišnji program ili plan rada za 2021. godinu do Kolegija. Ja sam predsjednica i ja vam obećavam da ću čak jako kvalitetan program rada da donesem i zato apeliram i pozivam ostale predsjednike da donesu godišnji program. Ne moraju četvorogodišnji, ali bar godišnji i da li će to biti jedan, dvanaest, dvije ili pet sastanaka da otprilike sebi poredaju te strateške planove i ciljeve za tu komisiju i da zaista krenemo raditi. Da li je plaćeno ili nije plaćeno, ja bih opet načela tu temu, jer smatram da bi trebalo više platiti i vanjske saradnike, a na kraju krajeva i same vijećnike, ali opet kažem to je do većine u Vijeću.“

Kemal Bratić, općinski načelnik: „ Ja moram priznati da se u većini dijelova diskusija slažem sa vijećnicima i možda nije moje da ja govorim o ovim temama koje su tijela Općinskog vijeća, ali gledam sa strane i smatram da imam poprilično dosta iskustva kako političkog tako i drugog životnog. Mislim da prvi zadatak treba da ima ova naša Komisija za statut i propise i da malo prečešlja. Ja sam ovih dana razmatrajući ove teme, pa recimo da nekim komisijama nešto dodamo, a nekim nešto oduzmemo, pa možda neke ugasimo, a neke nove otvorimo. Mislim da je vrijeme, jer ovo je prije ovako napravljeno iz mandata u mandat se ovo mahne i idemo reda radi. Recimo Komisiji za mlade može se dodati za mlade, sport i kulturu ili pošto imamo inicijativu Medžlisa islamske zajednice Doboj da formiramo jednu komisiju za vjerska pitanja. Znači to su te stvari koje trebamo raditi u hodu. Ja se u potpunosti slažem i odgovorno to tvrdim da je stvar rada svake komisije stav predsjednika. Naravno ako ima potrebe, za neke nema potrebe i zato ja ako imam pravo da predložim jedan zaključak našoj Komisiji za statut i propise da do sljedećeg Kolegija pripremi nekakve određene promjene. Ne radi se tu o plaćanju, mi znamo zašto je u prethodnom mandatu bilo malo kočenja oko rada komisija i ne bih ja to otvarao i ne bih se vraćao unazad. Snijeg koji je otišao on se otopio, mi idemo dalje da radimo. Ja ovo sugerisem, jer ne mogu Vijeću da predlažem da se treba to malo prepakovati, da tako kažem. Napravimo kuću, pa nam se nakon određenog vremena nešto ne sviđa i tako su i ova naša radna tijela. Svaki politički subjekat odgovara za onog koga je predložio da li bila komisija ili bilo šta drugo. Ako je neko smatrao da neki vijećnik može da vodi komisiju taj isti odgovara, jer ga je predložio. Mislim da će u ovom mandatu to biti drugačije, jer smo na Kolegiju našli određene kompromise. Neke stranke su dobile malo više po broju vijećnika i spoljnih, neke su dobile manje, oštećene su, ali eto trebamo raditi i možda je ovo najbolji način, jer da sada mijenjamo bilo šta po meni nije u redu i možemo nakon mjesec, dva, tri, pet reći izmjena ovih radnih tijela. To je vaše

diskreciono pravo i možete to raditi kada god osjetite potrebu da uradite, ali definitivno se trebaju ove komisije prepakovati. Prepakovati znači da li dodati nešto ili oduzeti, neke formirati ili neke ugaziti.“

Izet Hodžić, zamjenik predsjedavajućeg Općinskog vijeća: „ Ja ću se osvrnuti na prvi dio diskusije kolegice Emire vezano za rotaciju. Mi kada smo dobili ovo od Kolegija i od tehničke službe Općinskog vijeća za raspodjelu održali smo sastanak Povjereništva naše političke organizacije i donijeli svoje prijedloge i odluke i to je to. Sada da se ovdje vrše izmjene i rotacije i ako smatrate za potrebnim mi to na Povjereništvu možemo razmotriti i kao što kaže načelnik nije to problem i na bilo kojoj sjednici Općinskog vijeća se može donijeti takva odluka. Ja u principu podržavam vaš prijedlog, ali vidim da su dvije žene zastupljene u toj komisiji, a neću reći da je to sasvim dovoljno, ali nije ni previše. Znači nije nikakav problem i mislim da se razumijemo, mi ćemo to raspraviti i uopšte nije problem da se donese takva odluka na Vijeću i da se izvrši zamjena. Sada da mi ovdje ili neko u ime nas da to radi ne bi bilo u redu.“

Selmin Karić, predsjedavajući Općinskog vijeća: „Nije problem što neka komisija ne održi sastanak ako nema potrebe, problem je kada komisija treba da održi sastanak, a ne održi ga zato što neko ne dođe. Znači, nije problem ako komisija nije imala potrebe da se sastaje i zašto da se sastaje ako nema potrebe. Ako je bilo potrebe, a ne dođu članovi, odnosno nema kvoruma, to je problem i to je do nas. Moramo predlagati osobe u te komisije koje će shvatiti ozbiljno taj posao i dolaziti na sastanke. Mi sada ovdje raspravljamo ovako onako, a do nas je koga mi predlažemo, niko drugi i mi smo u tim komisijama i predsjednici tih komisija su vijećnici. Apsolutno ne vidim nikakav problem, mislim da pravimo nešto od nečega što ne trebamo praviti. Znači to su naše komisije, mi predlažemo članove tih komisija, što znači do nas je. Ja sam to uvijek tvrdio u uvijek ću tvrditi da nema potrebe za bilo šta, ali možemo ići u pravcu dodavanja nekih komisija ili izmjena i s tim se slažem, a možemo i Poslovnik mijenjati itd. Zato se slažem sa načelnikom da Komisija za statut i propise do narednog Kolegija nam pripremi materijal vezano za te komisije. Neka ona predloži da li treba neke komisije ukinuti, da li treba neke sastaviti itd.“

Emira Karić, predsjednica kluba vijećnika SDP: „ Mislim da ste shvatili, predsjedavajući, diskusije, pa ja i kritikujem nas same i sve su diskusije i išle na toj liniji da mi kritikujemo sami sebe. Ja neću skrivati neke stvari gdje su komisije, jer SDP je imao predsjednika, pa se nisu ni jednom, čini mi se, sastali. To su očigledne stvari i ja želim upravo kroz ovu diskusiju da te stvari idu prema boljim vremenima. Isto tako odličan je prijedlog da Komisija za statut i propise može riješiti određene stvari i tri komisije ukomponovati u jednu, pa neka radi svaki mjesec šta je problem, jer mi smo općinski vijećnici i zaduženi smo za to. Ja sam čula sa mjesta kolegicu Zerinu i jako je poražavajuće Zerina kada se žena ne bori za Komisiju za jednakopravnost spolova. Vi ste predstavnik tog pola koji itekako treba da sjedi još više i ako treba i 51% u ovim klupama, ali možda čak vremenom vidim da ste zalutali.“

Selmin Karić, predsjedavajući Općinskog vijeća: „ Zahvaljujem se kolegice. Ima li još neko? Jeste li za zaključak da uz usvajanje ovog prijedloga da Komisija za statut i propise do narednog Kolegija da pripremi ovo o čemu smo razgovarali?“

Kemal Bratić, općinski načelnik: „ Ja moram reagovati pošto vidim da predsjedavajući ni vi ni zamjenik ne reagujete mislim da se mi trebamo boriti svi zajedno prije svega za ljudska prava, pa i za slabiji spol. Mislim da je kolegice Emira od vas veoma ružno da prozovete jednu damu i ja bih zamolio predsjedavajući da ako ništa da se vijećnica Emira izvini. Nije ovdje niko zalutao, ovdje je svako izabran voljom građana, voljom politika koje ste vi vijećnici ili kandidati za načelnika vodili i ovdje niko nije zalutao. Ja vas molim da se izvinete vijećnici koja je ovdje u prvom mandatu i ako znamo šta je bahatost, onda ste vi ovdje pokazali svoju bahatost. Ako neko ne misli kao vi onda je zalutao ili nešto drugo.“

Emira Karić, predsjednica kluba vijećnika SDP: „ Ja sam rekla da ću vidjeti da li je neko zalutao, znači ne direktno, a odgovor Zerine koji sam ja čula doduše sa mjesta je bio ne pada mi napamet, što je isto degutantno vezano i za ovu tematiku i zato sam malo grublje reagirala. Trebala je reći ne nisam spremna itd. ali da nema šanse i ne pada mi napamet mene je to iziritiralo.“

Selmin Karić, predsjedavajući Općinskog vijeća: „ Svako ima pravo na svoje mišljenje. Zamolio bih vas bez vrijeđanja bilo koga naročito vijećnika. Jeste li za usvajanje ovog prijedloga kandidata za imenovanje

radnih tijela Općinskog vijeća uz zaključak da do narednog Kolegija Komisija za statut i propise pripremi materijal vezano za ova radna tijela? Ko je za?"

Glasanje: ZA – 15, PROTIV – 0, SUZDRŽANIH – 0.

Ad.6. Razmatranje i usvajanje Izvještaja o realizaciji Programa rada Općinskog vijeća Doboj Istok za 2020. godinu.

Selmin Karić, predsjedavajući Općinskog vijeća: „ Tačku dajem na diskusiju. Prijavljenih nema. Zaključujem tačku. Ko je za?"

Glasanje: ZA – 15, PROTIV – 0, SUZDRŽANIH – 0.

Ovim smo iscrpili dnevni red.“

Izet Hodžić, zamjenik predsjedavajućeg Općinskog vijeća: „ U svom javljanju imao sam iskren nijet. Samo da poželim što brži oporavak našim kolegama Mehmedu i Samiru koji su bolesni i koji su u izolaciji i evo od kluba Narod i pravda što brži oporavak.“

Selmin Karić, predsjedavajući Općinskog vijeća: „Zahvaljujem, svi mi isto tako želimo. Zaključujem današnju sjednicu i zahvaljujem se na prisustvu.“

Sjednica je završena u 10, 55 sati.

ZAPISNIČAR
Behara Hadžić

SEKRETAR OPĆINE
Omer Hadžić

PREDSJEDAVALA
OPĆINSKOG VIJEĆA
Selmin Karić

Službena zabilješka:

Zapisnik je usvojen na 4. redovnoj sjednici Općinskog vijeća Doboj Istok održanoj dana 25.02.2021. godine.

U Klokotnici, dana 26.02.2021. godine

Zabilješku sačinio
Omer Hadžić, sekretar Općine